



## **"Ba al dakizu organikorik gabe birziklapena ez dela nahikoa?" lelopean urrats berri bat emanen da Baztango hondakinen kudeaketan**

*Baztango Udalak birziklapen datuak hobetzen jarraitzeko intentzioz pausu berri bat emanen du: Hondakin organikoak kontenedore bidez kudeatzeko aukera jarriko da martxan bailarako zenbait puntutan*

*"Ba al dakizu organikorik gabe birziklapena ez dela nahikoa?"*. Hala da bai, gure etxeko hondakin poltsaren erdia gai organikoa da eta hau behar bezala bereizten ez badugu, gure birziklapen maila arras exkax gelditzen da. Gehenez ere (eta gainerako guztia ongi egiten dugula suposatuz), sortutakoaren erdia birziklatzea lortzen dugu horrela.

Gai organikoa, ongi bereiziz gero aukera eta onura aunitz eskeintzen dituen hondakin frakzioa da: lurrera itzultzen ahal dugun kalitatezko emendakin organikoa eta energia lortzeko aukera ematen digu, ekonomia zirkularrerako aukera eskeintzen digu eta ingurumenaren zainketan eta aldaketa klimatikoaren aurkako borrokan aunitz suposatzen du, bertzeak bertze. Ez bereizteak aldiz, arazo larriak sortzen ditu, hala nola: negutegi efektuko gasen areagotzea, ur, lur eta airearen kutsaduraren haunditzea, ongari kimikoen erabileraren areagotzea, espazioaren okupazioa, etab. Azken finean gure ondorengoaren bizitza baldintzatuko duten efektu negatiboaren zerranda luze bat.

Honela bada, hondakinen birziklapen portzentaiak hobetu eta honela bai Europatik markatzen zaizkigun helburuak eta baita Nafarroako Hondakinen 2017-2027 urte bitarteko Planak zehazten dituen helburuak betetzeko bidean batetik, eta erran bezala, gure ondorengoaren bizi baldintzak hobetu nahian bertzetik, herritarrendako aukera berri bat jarri du martxan Baztango Udalak.

2019an indartu zen sortzaile bereziei kontenedore/kamioi bidezko gai organikoa biltzeko zirkuitua probestu eta honela jasangarritasuna bermatuz, ibilbide honen barnean **zenbait kontenedore marroi paratu dira auzo edo etxeko konpostan arrazoi ezberdinengatik parte hartzen ez duten herritarren hondakin organikoak poltsa hertsian kontenedore bidez biltzeko aukera eskeiniz.**

**Kontenedoreak**, erran bezala, **MARROIAK dira** eta **hauetan HONDAKIN ORGANIKOAK BAKARRIK botatzen ahalko dira**: hau da, janari hondakinak eta lorezantzako hondakin tikiak. Hondakin hauek beti poltsa hertsian bota beharko dira.



Udalak, gai organikoaren kudeaketarako etxe eta auzo konpostaren aldeko apustua egiten jarraitzen badu ere, arrazoi ezberdinengatik konpostan parte hartu nahi ez duten herritarrak gai organikoa kontenedore bidez bereiztera animatu nahi ditugu.

Azken urteetan birziklapen datuek piskanaka hobera egin duten arren, bideak aitzinera jarraitzen du eta horretarako urratsak ematen jarraitzeko asmoa du Udalak. Gai organikoaren birziklapena hobetzearekin batera, **KONTENEDORE BERDEEN erabilera murriztea behar beharrezkoa ikusten da**. Hori dela eta herritarrek nahasia eta behar bezala bereizi gabe botatzen duten hondakinen gaineko kontrola ere areagotuko da eta kontenedore berdeen ahoak murriztuz joanen dira.

Erran bezala bada, Udalak Baztango herritarrak gai organikoa bereizteko pausua ematera animatu nahi ditu, horretarako hainbat baliabide eskeiniko direlarik. Edozein zalantza izatekotan ere Udaleko hondakin zerbitzuarekin harremanetan jartzeko deia egiten du: [hondakinak@baztan.eus](mailto:hondakinak@baztan.eus) helbidean, 667808539 telefonoan edo Udaletxean bertan.

**Ba al dakizu**  
organikorik gabe birziklapena ez dela nahikoa?

Etxeko hondakinen %50a janari eta lorezantza hondarrak dira

Zer egin behar dut? Ze aukera ditut?

- 1.- Etxeko animaliei jatera eman
- 2.- Potesa hetsian edukiontzi marroian sartu
- 3.- Etxeko konpostagailuan hustu zuzenean
- 4.- Auzo konpostagailura eramán

**Hemen EZ**

Oraindik tenorez gabiltza... ez dago aitzakiarik, zuregatik eta ingurukoengatik, **BEREIZI HONDAKIN ORGANIKOA!**

**EMAN IZENA ETA AUKERATU ZURE BEHARRETARA HOBETKIEN MOLDATZEN DEN SISTEMA:**

→ 667 808 539 - [hondakinak@baztan.eus](mailto:hondakinak@baztan.eus)

Baztango Udala  
Gobierno de Navarra  
Nafarroako Gobernua  
Oficina de Residuos de Navarra  
residuos de navarra  
nafarroako hondakinak

2021eko apirilaren 15a  
Informazio gehiagorako: [hondakinak@baztan.eus](mailto:hondakinak@baztan.eus) edo 667 808 539 (Miren)